

LATGALIŠU GAZETA

Made in Latgola.LV

Itys svešvuordu salykums suplok latgaliskajam "Taiseits Latgolā" pa vosoru ir izskanējis vysā Latgolā. Projekts ir veiksmīgi eistynuots, nu jau tiek dūmuots par tuoluokajim dorba virzinim Latgolys i latgaliskuma popularizēšanai.



Kū vaira volūdu, tū lobuok! **lakuga.lv**

NŪTIKŠONU KALENDERS

● STARPTAUTISKI FOLKLORYS SVĀTKI "RUDYNŌJI 2008" 27.09.2008 – 28.09.2008, Leivuoni

Svātkūs pīsadales kai soveji, tai ari kaimiņvalstu folklorys kūpys. Paradzāta tikšonus ar Aglyunys Maizis muzeja vadeituoju Viju Ancāni. Maizis gudreibu izzynuošona i etnografiskūs litu ekspozicejis "Nu grydeņa da maizeitei" apsavieršona. Latgolys Muoksls i amatniceibys centrā zynuotniski praktiska konference "Tradicionāluos kulturys puormontuošonys aktualitatis myusu dīnos".

Parādžāts ari Mikeļdīnys jampadracis tierga laukumā (dzīduošona, doncuošona i.c.).

● DAUGAVPILS TEATRA LUGU KONKURSS LATGALIŠU VOLŪDĀ 01.10.2008., Daugavpils

Da 1. oktobram vēj var paspēt isnigt konkursam lugu latgališu volūdā. Lobuokuo luga tiks uzvasta Daugavpils teatri.

● "ĻEPETNĪKS" PREIĻŪS 03.10.2008., 21:00, Preiļu Kulturys centrs

Suokumā jaunišs diskoteka, tod apmāram 23.00 grupys "Dabas Durovys" koncerts.

● LATGALIŠU KULTURYS GAZETYS ZIŅU ARHIVS PAR SEPTEMBRI (roksti apsaverami škarsteiklā lakuga.lv):

Literatura
– Dūmu pylni pogolmi/septembris
– Meiluo mameņ, lyudzu, runoj ar mani latgaliski!
– Atbildeibys nosta
– Še, jem kreiteni i kruosoj pošā

Dinroksti
– Par laimi i par skrīšonu
– Ja ir rokstomis, tod nav papiera. Ja ir papeirs, tod nav rokstamuo. Ja ir obi, tad nav kū piraksteit
– Par dzejnikim Juoni i Ontonu
– Utopejis i cereibys
– Latgališu popraksteiba
– Kai mozi bērni

Audio
– "Latgolys Vuords" nu Reigys/18. septembris
– "Latgolys Vuords" nu Reigys/11. septembris
– "Latgolys Vuords" nu Reigys/4. septembris

Muzyka
– Latgališu dzišmu video versejis išk TV listem
– Trejūs nakti – "Dabas Durovu" singls i videoklips
– Veris "Bez PVN" jaunuokū video klipu dzīsmei "Screen"
– "Dabas Durovom" pyrmais albums

Leidzjiuteiba
– Aizsauli nūguojis Ontons Matvejāns

Pasuokumi
– Vokora styga "Latgaliskuo meklejumi Reigā"

Vysa kas
– Ontonam Slišanam Delfu bolva

Jureits
20. septembrī Bolvu rajona Škilbānu pogosta Upitē nūtyka jau saistais "Taiseits Latgolā/Made in Latgola" pasuokums. Andris Slišāns ar paleigim saorganizeja latgališu dzišmu i meilys aiļu festivalu ar nūsaukumu "Upītes Uobeļduorzs" – tys ir ikgadejais i, kai pošī organizatori atzeimejuši, vacuokais latgališu muzykys festivals iz pasaulā, deļ tam ka tyka reikuots jau piktū godu piec koortys.

Nu vokora da reitam muzykanti pīskandynova Upītes Tautys noma sīnys: "Karborators" (vīna nu vacuokajom rokgrupom vysā Latvejā); "Dyrbyni", Artūrs Upīts, Vīnsents Kūkuojis, Laura Bicāne, Laura_Laura, "Stage-on", "Patrioti.LG", "Crust", "Likteneigais pagrīzīns iz Vainovu", "Dabas Durovys", "Bez PVN", "Green Novice", "New Buzz" i "VM". Paleigūs goja ari literati Ontons

Slišāns, Mārite Slišāne, Santa Matīsāne, Jurs Viļums i Raibis Suņs. Pauokuma laikā priškā tyka staiteits "Dabas Durovu" albums "Ļepetņiks", kai ari O. Slišāns piduovuoja sovu gruomotu "Salve Regina", kas ir erotiskū meilys aiļu kruojumeņš, kurš naseņ igivs vysleluokū atzineibu portala "Delfi.lv" skaiteituoju vydā.

Reizi itais pasuokums beja ari nūslāgums Latgolys Kulturys programmys (administrej Latgolys regiona atteisteibys agentura, finansejumu snidz Kulturkapitāla fonds) atbalsteitajam projektam, kura itvorūs tyka reikuots vysmoz pa vīnam latgališu muzykys pasuokumam kotrā Latgolys rajonā.

Jau iprišk ziņots, ka 19. jūli leluokais ituos vosorys latgaliskais koncerts nūtyka Preiļūs (skait "Latgales Laika" 22. jūļa numuri), tod 26. jūli Kruoslovys rajona Dagdā

"Annys Dīnā" tyka reikuots "Latgališu muzykys melodiskais vokors" – pīsadalesa "Inga i Normunds", "Rudiņš Steigys", Laura Bicāne i "Patrioti.LG". Rēzeknī Eiropys tautu festivala itvorūs 29. jūli nūtyka Latgališu muzykys nakts – pīsadalesa "Inga i Normunds", "Bez PVN", Borowa MC" i "Likteneigais pagrīzīns iz Vainovu".

Piec nalelys atpyutys 22. augustā Ludzys rajona Kuorsovā piļsātys svātku itvorā nūtyka Jaunišu latgališu muzykys koncerts – pīsadalesa "D-Light", "New Buzz", "Dabas Durovys" i "Green Novice". Ūtrajā leluokajā Latvejis mistā Daugavpilī tyka reikuots Zīneibu dīnai vēļteits studentu koncerts ar muzykantu daleibu nu "Bez PVN", "Dabas Durovys" i "Likteneigais pagrīzīns iz Vainovu" (vairuok par itū pasuokumu skait "Latgales Laika" 5. septembra numuri).

I vysa golā Bolvu rajonā nūtyka jau piminātais pasuokums "Upītes Uobeļduorzs". Foto nu visim "Taiseits Latgolā/Made in Latgola" pasuokumim var apsavert škarsteiklā madeinlatgola.lv

Kas byus tuoļuok? Pyrmuos latgališu muzykys koncerturnejis organizatori i daliniki grybātu vīnu pasuokumu ar kūpeigū zeimulu sareikuot ari myusu vajsts goļvyspiļsātā Reigā. Dūmojams, ka tyvuokuo goda laikā taidis koncerts ari tiks sareikuots, palics tik taidis "seikums", kai atarast atblystūšus fiansialūs sadarbeibys partnerus.

Kai ari jau varam izstuosteit, ka tyvuokajā laikā (puors nedeļuos) adress madeinlatgola.lv puorsaveiduos par pyrmi latgališu interneta veikalu, kuramā varies išaguoduot gruomotys, muzyku, amatniku dorbus i vysaidai cytaiži interesantus Latgolys ražuojumus.

Vokora styga "Latgaliskuo meklejumi Reigā"

Piec vosorys breivdinom školānim otkon succās vuceibys, studentim – studejis. Daudzi, kab nasaceitu vaira, apgiut augstuokuos zineibys brauc iz Reigu. Ari latgališi. Koč leidz Latgolai ir lobs gobols, izaruoda, ka Reigā var sastapt zynomus vuordus, cylvākus i vīty, kurys saistuos ar Latgolu.

LgSC

Ideja meklēt latgaliskū Reigā roduos jau lobu laiku atpakaļ, tik vys nasaguoja tū eistynuot. Augustā "Latgolys Studentu centra" bidri, kuri studej i/voi struodoj Reigā, salyka goļvys i spēkus kūpā, kab pasuokums nūtyktu.

I tai – iz "Latgolys Studentu centra" aicynuojumu meklēt latgaliskū kūpā vokora stygā "Latgaliskuo meklejumi Reigā" 2008. goda 3. septembrī atsasauce apmāram 30 daliniku, kuri puorstuov dažaidys augstškolas.

Pyrmais puorbaudejums dalinikim beja Reigys Goreiguo seminara (RGS) atrašona. Cikom gaidjom kavātuojus i tūs, kuri aizblūdejuši, RGS studenti stuosteja par sovu školu i sevi.

Piec ekskursejis pa seminaru visi tyka aicynuoti sasatuot pogol-

mā pa komandom. Saguoja vasalys septenis – "Elfi", "Ūtruo komanda", "Žypereigi", "L – 4", "Da Best", "Ezeiši myglā" i "Vacī buki". Cikom napaciteiguokī sajāme starta signalu, komandys, kuro beja juogaida, runovās ar seminaristim.

Pavysam komandom Latgolys priškpiļsātā, Vacreigā, i tai saucamajā Reigys klusajā centrā beja juoatrūn 10 kontrolpunkti, kurim ir saisteiba ar Latgolu, juopylda dažaidi aizdavumi, juomeklej atbīdis iz vaicuojumim, juoparuoda sovu atjauteibu, juofotografēj Latgolys vitvuordi itt.

Nūslāgums beja Esplanadē pi Raiņa pīminekļa. Daliniki skaiteja sovy vokora stygys laikā topušos ailis i dzīduoja kūpā ar Veron Martin i puišim nu "Bez PVN".

Vyslobuok ar aizdavumim go-



lā tyka komanda "Da Best", ūtri palyka "Vacī buki", nu jūs pavysam nadaudz atpalyka "Žypereigi".

LgSC soka lelu paļdis vysim dalinikim, RGS seminaristim i Edgaram Cakulam, Verneram, "Bez PVN" puišim i tim, kuri pilyka sovu ruku, kab pasuokums nūtyktu!

"Latgališu Gazetu" atbolsta Latgolys regiona atteisteibys agentura i Kulturkapitāla fonds.

